



Grad Sarajevo
City of Sarajevo

Bosna i Hercegovina
Federacija Bosne i Hercegovine
Kanton Sarajevo
Grad Sarajevo
GRADSKO VIJEĆE

Odluka
o opredjeljenju za preuzimanje na upravljanje i održavanje
Spomen-parka Vraca
(Prijedlog)

Predlagač: Gradonačelnica

Obradivač: Gradska služba za urbano planiranje,
investicije stambene i komunalne poslove

Sarajevo, oktobar 2021. godine

Adresa: Hamdije Kreševljakovića 3
71000 Sarajevo, BiH
Tel: +387 33 216 659
Fax: +387 33 205 874
Email: gsgv@sarajevo.ba
Web: gradskovijece.sarajevo.ba



Na osnovu člana 16. stav (1) tačka 2., člana 16. stav (2) i 26. stav (1) tačka 2. Statuta Grada Sarajeva („Službene novine Kantona Sarajevo“, broj 34/08 – prečišćeni tekst), Gradsko vijeće Grada Sarajeva, na sjednici održanoj __. __. 2021. godine, donijelo je:

(Prijedlog)

Odluka
o opredjeljenju za preuzimanje na upravljanje i održavanje Spomen-parka Vraca

Član 1.
(Predmet Odluke)

- (1) Grad Sarajevo izražava opredjeljenje da preuzme na upravljanje i održavanje Spomen-park Vraca.
- (2) Spomen-park Vraca proglašen je nacionalnim spomenikom Bosne i Hercegovine, Odlukom Komisije za nacionalne spomenike Bosne i Hercegovine, broj 07.1-02-192/04-5 od 05.05.2005. godine, i obuhvata zemljište označeno kao k.č. br. 1173 i 170 (stari premjer) i k.č. br. 3077 i 3078 (novi premjer), k.o. Novo Sarajevo II, z.k. uložak br. CXXX/541 i CXXXV/72, općina Novo Sarajevo, Federacija Bosne i Hercegovine, Bosna i Hercegovina („Službeni glasnik BiH“, broj 12/06.)

Član 2.
(Saglasnost i ovlaštenje)

Gradsko vijeće Grada Sarajeva izražava opredjeljenje i daje saglasnost i ovlaštenje gradonačelnici Grada Sarajeva i Pravobranilaštvu Grada Sarajeva da, u okviru svojih nadležnosti, poduzimaju sve potrebne pravne, organizacijske, tehničke, administrativne i finansijske radnje i aktivnosti u cilju uspješne realizacije projekta definisanog članom 1., kao i da poduzimaju radnje na rješavanju imovinsko-pravnih odnosa putem odgovarajućih pravnih poslova.

Član 3.
(Dužnosti)

- (1) Grad Sarajevo će istražiti najadekvatnije rješenje upravljanja i održavanja nacionalnog spomenika Spomen-parka Vraca, s ciljem potpune revitalizacije parka i stavljanja na korištenje ovog historijskog lokaliteta građanima i posjetiocima Sarajeva.
- (2) U ovim aktivnostima Grad Sarajevo će saradivati sa ostalim nadležnim i zainteresovanim institucijama i subjektima.
- (3) Grad Sarajevo će do konačnog rješavanja imovinsko-pravnih odnosa preuzeti obavezu tekućeg održavanja Spomen-parka Vraca sporazumno, sa ostalim nadležnim i zainteresovanim institucijama i subjektima.
- (4) Po sticanju neophodnih uslova, Grad Sarajevo će putem gradskog komunalnog preduzeća upravljati Spomen-parkom Vraca.

Član 4.
(Sigurnost)

Posebna pažnja u budućem konceptu upravljanja će se obratiti na zaštitu ljudi, objekata, inventara i prirodnog bogatstva parka, te dugoročnu održivost.

Član 5.
(Način finansiranja)

- (1) Grad Sarajevo će godišnje planirati adekvatna namjenska sredstva za realizaciju projekta.
- (2) Grad Sarajevo će tražiti mogućnost iznalaženja dodatnih sredstava za realizaciju projekta u saradnji sa drugim nivoima vlasti, domaćim i međunarodnim subjektima.

Član 6.
(Stupanje na snagu i početak primjene)

Ova odluka stupa na snagu narednog dana od dana objavljivanja u „Službenim novinama Kantona Sarajevo“.

PREDSJEDAVAJUĆI GRADSKOG VIJEĆA

Jasmin Ademović

Broj:

Datum:

OBRAZLOŽENJE

I PRAVNI OSNOV

Pravni osnov za donošenje Odluke o preuzimanju upravljanja i održavanja Spomen parka Vraca sadržan je u uvodu teksta Odluke. Članom 16. stav (1) tačka 2. Statuta Grada Sarajeva („Službene novine Kantona Sarajevo“, broj 34/08 – prečišćeni tekst), propisana je nadležnost Grad Sarajeva, između ostalog, i nad javnim parkovima. Članom 16. stav (2) Statuta Grada Sarajeva („Službene novine Kantona Sarajevo“, broj 34/08 – prečišćeni tekst), propisana je nadležnost Grad Sarajeva da u obavljanju pojedinih poslova iz samoupravnog djelokruga Grada Sarajeva može, u skladu sa zakonom, povjeriti ustanovama, preduzećima i drugim pravnim licima osnovanim radi obavljanja javnih službi u Gradu Sarajevu. Članom 26. stav (1) tačka 2. Statuta Grada Sarajeva („Službene novine Kantona Sarajevo“, broj 34/08 – prečišćeni tekst), propisana je nadležnost Gradskog vijeća Grada Sarajeva da donosi odluke, druge propise i opće akte i daje njihovo tumačenje.

II RAZLOZI DONOŠENJA

Spomen-park Vraca nalazi se na dominantnoj koti, na prostoru od oko 6 ha, oko austro-ugarske tvrđave, u dijelu sarajevskog naselja Vraca, na sjevernim padinama Trebevića. Prostor kompleksa je sa svih strana ograničen kolskim komunikacijama. Položaj kompleksa u odnosu na grad je takav da on dominira iznad Grbavice i Kovačića.

U toku 1898. godine, Austro-Ugarska je na obroncima Trebevića, na južnom dijelu grada, izgradila vojnu tvrđavu.

Za vrijeme II svjetskog rata, kada je Sarajevo bilo u Nezavisnoj državi Hrvatskoj, objekat tvrđave Vraca pretvoren je u službeno stratište i gubilište gdje su ubijani građani grada Sarajeva.

Na Vracama su, od sredine 1941. godine pa tokom cijelog četverogodišnjeg rata, vršena stalna pogubljenja koja su približavanjem kraja II svjetskog rata postala intenzivnija. Ubijeni na Vracama su i sahranjivani na Vracama. Također, na tom mjestu je zakopavana i većina zatočenika ubijenih ili preminulih u policijskim mučilištima u Sarajevu.

Budući da su Vraca postala sinonim otpora i borbe građana protiv fašizma, na ovom mjestu izgrađen je i otvoren 25. novembra 1981. godine Spomen-park, a tvrđavi je data muzejska namjena. U atriju je bilo upisano 9.091 ime žrtava rata koje su ubijene u Sarajevu i oko njega u 2. svjetskom ratu.

Kompleks Spomen-parka se sastoji od sljedećih elemenata/sadržaja: ulazni plato, obilježje na stratištu, skulptura-spomenik Ženi borcu, vidikovac, vječna vatra sa fontanom, ceremonijalni plato, obilježje posvećeno poginulim borcima grada, obilježje narodnim herojima sa kosturnicom, obilježje posvećeno borcima pokreta otpora u gradu sa Titovim priznanjem borcima u okupiranim gradovima, obilježje žrtvama fašizma sa Titovom porukom, izložba „Svjedočanstvo o borbi” smještena u tvrđavi, obilježje posvećeno jedinicama NOV-e koje su učestvovala u operaciji oslobođenja Sarajeva.

U agresiji 1992.-1995. godine, tokom opsade Sarajeva, Spomen-park služio je kao mjesto odakle je grad Sarajevo gađan iz teškog topovskog naoružanja i snajpera. Tada, i jedno vrijeme nakon rata, cijeli kompleks je devastiran, kako tvrđava i pojedinačna spomen-obilježja, tako i parkovske površine, platoi, stepeništa i dr.

Spomen-park Vraca proglašen je nacionalnim spomenikom Bosne i Hercegovine, Odlukom

Komisije za očuvanje nacionalnih spomenika BiH („Službeni list BiH“, broj 12/06). Nacionalni

spomenik obuhvata zemljište označeno kao k.č. br. 1173 i 170 (stari premjer) i k.č. br. 3077 i 3078 (novi premjer), k.o. Novo Sarajevo II, z.k. uložak br. CXXX/541 i CXXXV/72, općina Novo Sarajevo, Federacija Bosne i Hercegovine, Bosna i Hercegovina.

Obzirom na sve naprijed navedeno, opredjeljenje Grada Sarajeva je da sačuva, zaštiti i oživi ovaj značajan spomenik našoj historiji, a sve kako bi budućim generacijama ostavili kulturu sjećanja na važne historijske periode grada.

Spomen-park u poslijeratnom periodu je prepušten stihijskom upravljanju, odnosno njegovo održavanje zavisi od dobre volje nadležnih institucija, te je gradonačelnica Grada Sarajeva odlučila da preduzme aktivnosti kako bi Grad Sarajevo preuzeo kontinuiranu brigu o daljnjem upravljanju i održavanju ovog značajnog lokaliteta.

Sve dalje navedene aktivnosti bi bile predmet daljnjeg postupka i poduzimale bi se na osnovu Odluke koja je data na razmatranje i usvajanje Gradskom vijeću Grada Sarajeva.

III FINANSIJSKA SREDSTVA

Za realizaciju ove Odluke potrebno je predvidjeti sredstva u Budžetu Grada Sarajeva.